

TEZAUUR LITURGIC
8 NOIEMBRIE

ACATISTUL
SF. ARHANGHEL
URIIL



MOSCOVA, 2000



Акафист

Архангелу Божию Уриилу

Кондак 1

Избранный Предвечным Господом от горних ангельских чинов на служение спасению рода человеческого, пречудный Архангеле Урииле; днесь торжествуя пресветлую память твою, молим тя: озари умы наша светом Премудрости Божественныя и сердца наша преобрази огнем любви небесныя, да с радостию величаем тя, покровителю наш святой и наставниче небесный, зовуще ти сице: Радуйся, богоносный Архистратиге Урииле, в долину вечной радости стопы наша направляющий.

Икос 1

Ангелов хоры и Архангельский лик, мучеников добропобедное воинство, всехвальный пророков и апостолов сонм и праведных неисчетный ряд во славе велией пребывая, непрестанно величают Триипостаснаго Творца и Владыку нашего; с ними же и ты, всехвальный Урииле, присно ликуеши. Мы же, удаленные от тебе не точию местом, а обаче несовершенством нашим, усердно просим тя, поспешествуй нам внити в

чертози нетленные Отца Небеснаго, ныне
взывающим ти сице:

Радуйся, милосердие Всесвятая Троицы к нам
преклоняющий.

Радуйся, с огнезрачными серафимами великаго
Господа выну величающий.

Радуйся, с многоочитыми херувимами
трисвятую песнь радостно воспевающий.

Радуйся, с господствы, власти, силы в Свете
Лица Божия пребывающий.

Радуйся, со начала, престолы и ангелы от
земнородных превозносимый.

Радуйся, от всех концов вселенная величаемый
и хвалимый.

Радуйся, Архистратиже Божий, Церкви
Небесная похвало и славо.

Радуйся, Архангеле, устрой в церкви земной
вечной Истины торжество.

Радуйся, богоносный Архистратиже Урииле, в
долину вечной радости стопы наша
направляющий.

Кондак 2

Видя, всехвальный Урииле, в первый день
Всемогущим Богом мир созданный, и созерцая
величие и мудрость Творческия десницы
Господа нашего, возликовал еси, яко вся, иже от
Него исходит, благо есть, яко Благ, Милосерд и
Совершен есть Отец наш Небесный, и купно со
всеми чины ангельскими, наблюдая рождение
мира дольнего и горнего, воспел еси
Всевышнему песнь благодарения: Аллилуиа.

Икос 2

Разумом и всем естеством твоим, светозарный
Урииле, утвержден бых во благодати Божией.
Верностию же и любовью ко Господу
Всемогущему горяй, купно с великим
Архистратигом Михаилом и Ангелы светлыми
встал еси на брань противу гордынею
ослепленнаго Денницы и низвергл еси его с
Небес аж до сеней тартара преисподняго. Мы
же, чествуя победу твою, просим тя: огради нас
от козней бесовских и искушений душетленных,
утверди сердца наша в вере и верности ко
Творцу нашему и прими славословия сия:

Радуйся, богодарованною ти силою коварство
духов злобы поднебесной истребляющий.

Радуйся, дома, поля и скот наш от губительства их освобождающий.

Радуйся, в странствиях земных от преткновений нас оберегающий.

Радуйся, по смерти души верных от прельщений бесовских изымающий.

Радуйся, от путей соблазнов на дорогу благочестия нас направляющий.

Радуйся, брань помыслов богохульных угашающий.

Радуйся, любовь и доверие к Богу в сердцах наших возвращающий.

Радуйся, от пристрастий и влечений греховных души наша исцеляющий.

Радуйся, богоносный Архистратиже Урииле, в долину вечной радости стопы наша направляющий.

Кондак 3

Силою Царя Небеснаго утвержденный и Премудростию Творца всего сущаго озаренный, волю Всесвятыя Троицы исполняя, с мечем огненным стал еси близ врат рая земнаго и вход вспять согрешившим прародителем нашим

преградил еси, да не внидет ничто нечистое в сад святыни Всевышняго. Мы же, сия убо поминающе, молим тя, Архистратиже славы Божия, укрепи души наша благодатию, да отсечем пагубоносныя искушения и возможем купно с тобою во веки воспевати Господеви: Аллилуиа.

Икос 3

Имаши, всехвальный Архангеле Урииле, песнопения тебе возсылаемья на небеси и на земли, тя бо, аки вождя и воеводу, чтут ангельския чины, с ними же купно ты, Архистратиже богоносне, предстоиши пред Престолом Святыя Троицы и молитвы, иже мы от любве и усердия сотворяем ти, возносиши Отцу Небесному, милость Его к нам, земнородным, приклоняя. Сего ради величаем тя сице:

Радуйся, первоангеле, любовью к Создателю всея твари присно пылающий.

Радуйся, и нас в любви к Богу благодатно утверждающий.

Радуйся, таинства Небеснаго Царствия избранником Господним открывающий.

Радуйся, благоговением пред Премудростию Божиею ны обогащающий.

Радуйся, разума кичение и ума превозношение угашающий.

Радуйся, в кротости и доверии Творцу всех нас укрепляющий.

Радуйся, яко тобою разум верных в истине утверждается.

Радуйся, яко тобою неверныя к вере обращаются. Радуйся, богоносный Архистратиже Урииле, в долину вечной радости стопы наша направляющий.

Кондак 4

Бури искушений и соблазнов моря житейскаго постигают нас, земнородных, удаленных от тебе, светоносный Архистратиже горних сил; сего ради, на предстательство твое, святой Урииле уповая, просим тя, возведи ны от рабства греховнаго в свободу чад Божиих, утверди волю нашу в добродетелех Христоугодных, воспламени в сердцах наших угасающий огонь веры и надежды и настави за вся Творца благодарити, воспевая Ему: Аллилуиа.

Икос 4

Слышавше сказания писателей ветхозаветных о явлениях и чудесах твоих, светоносный Архистратиже Урииле, благоговейно внимаем оным, радуемся и веселимся о Господе нашем, вся ко спасению нашему и вечному единению с Ним промышляющему и тебя, всеблагий вестниче Предвечнаго Отца Небеснаго, величаем и прославляем, с надеждою на предстательство твое пред Богом:

Радуйся, устроить житие наше согласно с волею Господнею нас подвизающий.

Радуйся, к благому познанию промысла о нас Божия духовные очи наша изостряющий.

Радуйся, добрую помощь и светлую поддержку в час сомнений дарующий.

Радуйся, от всякаго лукавствия нас отвращающий.

Радуйся, от заблуждений и соблазнов на путех духовных оберегающий.

Радуйся, пресвитеров и наставников премудростию и человеколюбием обогащающий.

Радуйся, невзгоды, тоску и печали суетныя от нас удаляющий.

Радуйся, нелицемерную радость о Бозе Спасе нам низпосылающий.

Радуйся, богоносный Архистратиже Урииле, в долину вечной радости стопы наша направляющий.

Кондак 5

Боготочною звездою, просветляющей мрак уныния и тревог за судьбы грядущия народа Божияго, явился еси, светоносный Архистратиже, святому пророку Божию Ездре, и возвестил еси ему о близости перваго пришествия в мир Семилюсерднаго Господа нашего Иисуса Христа, Крестом Своим грехи всех народов и всякаго человека Искупившаго. Сего ради просим тя, наставниче наш небесный, укрепи нас в уповании на благосердие Спасителя, да поем Ему песнь покаяния и благодарения: Аллилуиа.

Икос 5

Видев тя, богославный Урииле всеблагим вестником таинств Царствия Небеснаго, святыи пророк Ездра исполнися весь трепета и благоговения пред тобою. Ты же показал еси ему

путь, иже возжела он видети и научил еси его, откуда тече лукавство в сердце человеческое, отринувшее милость и благодать Отца нашего Небеснаго. Сице молим тя, святой Урииле, настави нас на путь покаяния, да явимся достойными быти милостей Божиих, и тебе, с надеждою обрести сия, воспоим сице:

Радуйся, снисхождением твоим с Небесе утешение и отраду святому Ездру даровавый.

Радуйся, в тяжком служении пророческом от маловерия избранника Божия свободивый.

Радуйся, в образах и притчах ему грядущия дали веков открывый.

Радуйся, в верности завету через Ездру народ Божий паки и паки утвердивый.

Радуйся, надеждою и упованием на милостивое воздаяние Господне нас окрыляющий.

Радуйся, классы добродетелей в сердцах боголюбивых вращивающий.

Радуйся, трезвомыслием разум наш преображающий.

Радуйся, ангелоподобную любовь ко Творцу стяжати нам помогающий.

Радуйся, богоносный Архистратиже Урииле, в долину вечной радости стопы наша направляющий.

Кондак 6

Проповедника богоглаголиваго, святого Ездру, пророка Израильскаго, укрепил еси, светозарный Урииле, во уповании на промысел Всеблагаго Господа нашего и в любви к народу Божию совершенным сердце его сотворяя. Мы же ныне, сие с радостию воспоминающе, просим тя: наполни сердца наша любовью ко всякому человеку, освободи я от ненависти и пристрастий суетных, да возможем купно с тобою Богу ангельское пение возносить: Аллилуиа.

Икос 6

Возсиял еси светом Премудрости Божественныя всехвальному пророку Ездру, всеславный Архангеле Урииле, в изнеможении от скорби сердечныя существу, и возвестил еси тому, яко от оскудения в вере и теплохладия душевнаго печали многообразныя мир постигают и токмо в богатом и Милосердном своем Отце Небеснем всемогущное врачевание от недуг мира и человека всякаго выну пребывает. Сего ради тебе,

всеблагий наш заступниче и покровителю,
взываем сице:

Радуйся, яко от нечестия, уныния и малодушия
ты еси исцеление.

Радуйся, яко во мраце велией скорби света
небесныя милости ты еси отражение.

Радуйся, от немощей и неправды века нашего
исцеление даруй.

Радуйся, семена страстей злых в сердцах наших
пожегаяй.

Радуйся, к источнику благодати Божия очи
наша изостряющий.

Радуйся, разумением путей богоугодных нас
обогащающий.

Радуйся, быти плодоносными в вере нас
сподобляющий.

Радуйся, богоносный Архистратиже Урииле, в
долину вечной радости стопы наша
направляющий.

Кондак 7

Хотяще достойно прославити тя, о всеблагий
Архангеле, разумеем, яко несть довольно словес

земных, дабы по достоянию воспети славу твою, яко ты купно со всеми чиноначальники Сил Небесных, купно же с Серафимы, Херувимы, Престолы, Господствы, Силы, Власти, Начала, Архангелы и Ангелы в велицей славе предстоиши Престолу Триипостаснаго Бога нашего. Не дерзая убо сотворити ти славословие достойное, но на милость твою к нам, святой Урииле, уповая, Господеви поем: Аллилуиа.

Икос 7

«Новое вино не наливают в мехи ветхия», тако глаголет Господь учеником Своим; мы же сему последовати желая, усердно просим тя, святой наш наставниче, аще и начнем себя исправляти, бывающи нови вместо ветхих, сия же благодати исправления буди наш ходатай, Архангеле Урииле, помози нам в немощех, уврачуй страсти молитвами твоими и милостиво вонми гласу воздыхания нашего, яко глаголем ти сице:

Радуйся, нищетою духовною всех нас обогащающий.

Радуйся, в сердцах и помыслах наших чистоту богоугодную насаждающий.

Радуйся, плачущим о гресех утешение в покаянии посылающий.

Радуйся, милость к падшим грешником в нас возбуждающий.

Радуйся, к молитве об обращении заблудших призывающий.

Радуйся, ненавидимым и гонимым в тени крил твоих покой дарующий.

Радуйся, алчущих и жаждущих Правды хлебом Истины Христовой насыщение.

Радуйся, труждающихся о мире и согласии во благих делах утверждение.

Радуйся, богоносный Архистратиже Урииле, в долину вечной радости стопы наша направляющий.

Кондак 8

Странное и непостижимое таинство всемилосердныя любве Божия к падшему роду человеческому с Небес созерцал еси, всехвальный Архангеле Урииле, егда Спаситель грехи и страсти на Крест вознесе и смертию Своею ны искупи. Сице молим тя: научи нас со благодарением и радостию прославляти Воскресшаго Господа, пасхальное пение воспевая Ему: Аллилуиа.

Икос 8

Весь еси в вышних, святой Урииле, и во славе почиваеши купно со святыми Архангелы Михаилом, Гавриилом, Рафаилом, Салафиилом, Иегудиилом и Варахиилом, и с ними моляся, приклоняеши к нам милость Триипостаснаго Бога. Сего ради со благодарением на устах и радостию на сердце воспеваем ти похвалы сия:

Радуйся, молящимся тебе благополучие земное радостно даруяй.

Радуйся, чтущим тебя восхождение к Небеси путем спасительным облегчаяй.

Радуйся, от губительности гнева и уныния всех ны свободяяй.

Радуйся, духом кротости и истиннаго смирения чтущих тя озаряяй.

Радуйся, из мглы страстей греховных и сетей бесовских скоро извлекающий.

Радуйся, к исправлению больного нрава нашего и дурных деяний чудно побуждающий.

Радуйся, во брани духовней пречудное вспоможение и стойкость ниспосылающий.

Радуйся, милосердие Всемогущего Бога к нам грешным приклоняющий.

Радуйся, богоносный Архистратиже Урииле, в долину вечной радости стопы наша направляющий.

Кондак 9

Все чины ангельския купно с тобою, всехвальный Урииле, с радостию среташа Господа Иисуса, по Успении Матери Своея, увенчавшаго Святую Деву венцем нетленным Царицы Небесныя. Ныне ты, яко присно предстояй пред престолом Богоматери, молитвами твоими страдания и тревоги многообразныя, муки и печали сердечныя, горести и напасти житейския и скорби прочия от нас пречудно удали и подвигни тобою благодееющему нам Господу умиленно воспевати: Аллилуиа.

Икос 9

Вития многовещанныя и риторы сладкоголосыя не возмогут ни постигнути несовершенным разумом людским, ни воспети всеми языки человеческими всех таинств Царствия Небеснаго, идеже ты, всехвальный Архистратиже Урииле, выну пребываеши во

славе, яко един «от седми» Ангелов велиих, иже предстоят престолу Вседержителя и возносят Ему от всех концов земли молитвы верных чад Его. Мы же, сие убо поминающе, и аще не ангельскими, но человеческими речами, воспеваем тя сице:

Радуйся, сиянием твоея небесныя любви к нам всех нас присно озаряющий.

Радуйся, в благодарности и признательности к Отцу нашему Небесному возрастати нам помогающий.

Радуйся, прощати причинивших нам беды и скорби, нас научающий.

Радуйся, сумрак немощей наших светом милосердной помощи небесной разгоняющий.

Радуйся, мир и спокойствие всем нуждающимся на сердце благодатно ниспосылающий.

Радуйся, в часы сомнений и мук душевных добрыми помыслами нас укрепляющий.

Радуйся, от тяготы былых переживаний и тревожений душевных исцеляющий.

Радуйся, на всех путех жития нашего небесным светом преславно озаряющий.

Радуйся, богоносный Архистратиже Урииле, в долину вечной радости стопы наша направляющий.

Кондак 10

Спасение рода человеческого устрояя, Всемудрый Творец наш благоволи послати ангелы Своя на помощь людям страждущим от греха, скорбей и болезней, дабы явити им всемогущество милосердныя Своея любве. Ты же, Архистратиже достославне, скоро на помощь к нам с небесных чертогов, аки друг и наставник любящий слетаеши, и паче прошений наших милости небесныя источаеши, подвизая Всемогущему и Всемилосердному Богу умиленно воспевати: Аллилуиа.

Икос 10

Стена нерушимая и покров велий и всеблагомощный еси, богоносный Архистратиже Урииле, всем христианом, иже с верою, любовию и надеждою почитают тебя, как милостиваго покровителя, заступника небеснаго и всемудраго дорог спасительных указателя, сомнений разрешителя, во брани духовней и искушениях скороаго и благаго укрепителя, ведомых и неведомых язв душевных

врачевателя и недуг телесных целителя, и с благодарностию воспевают ти сице:

Радуйся, со всеми святыми и ангелы о спасении вечнем Святую Троицу непрестанно умоляющий.

Радуйся, благосердие и милость Отца Безначального нам преславно отверзающий.

Радуйся, возрастати в любви истинней и благоплодной ко Иисусу Христу наставляющий.

Радуйся, дары и благословения Духа Всесвятаго стяжати и сохранять научающий.

Радуйся, Всенепорочней Деве, Царице чинов горних, честь достодолжную воздати подвизающий.

Радуйся, милосердною любовью к ближнему пречудно наполняющий.

Радуйся, благия чувства честности и трудолюбия в нас возвращающий.

Радуйся, от душевленных нравов века сего слабыя сердца наша отвращающий.

Радуйся, богоносный Архистратиже Урииле, в долину вечной радости стопы наша направляющий.

Кондак 11

Пение всерадостное возносим ти,
богодарованный покровителю наш,
Архистратиге Урииле, и со усердием молим тя:
силою и властью тебе от Творца дарованными,
благоволи утишити бури стихий природных и
ниспослати облегчение и отраду всем от них
страждущим, яко ты, Архангеле благий,
внемлещи мольбам всех людей, от полночных и
полуночных краев, от востока и запада земли с
надеждою взывающих о тебе Господеви:
Аллилуиа.

Икос 11

Свет Невечерний выну созерцаеши,
светоносный Архангеле Урииле, и нам
источаеши тихий свет небесный, да наполнятся
души наша любовью истинною ко всему
творению Господню, да воцарится во веки в
сердцах наших Распятый за ны Спаситель и
Искупитель наш, да тобою, всеславный и
добрый наставниче небесный, научаеми и
вразумляеми, возможем и мы волю Божию с
любовию творити и бремя легкое Христово
радостно носить. Сего ради вопием ти сице:

Радуйся, любити всех любовью Христовою нас
научающий.

Радуйся, утешати ближняго и милости ему творити нас подвизающий.

Радуйся, паче даяти, нежели брати, вразумляющий.

Радуйся, неплодныя, недобрыя и унылыя помыслы, аки плевелы, поपालяющий.

Радуйся, отраду и утешение всем страждущим дарующий.

Радуйся, суетное чувство вины на подлинное покаяние прелагающий.

Радуйся, вся упования наша в недра Высшего милосердия полагати наставляющий.

Радуйся, трезвением благим и благомыслием душевное устроение наше преображающий.

Радуйся, богоносный Архистратиже Урииле, в долину вечной радости стопы наша направляющий.

Кондак 12

Благодатию Божественною озаренный, светозарный Архистратиже Урииле, твоим всеблаготворным предстательством пред Престолом Всесвятых и Единосущных Троицы, испроси нам силы преодолевати беспомощность,

раздражительность, беспокойство, страх и наполни души наша миром Божиим и радостию духовною, яко да тобою, богоносне Архангеле, наставляеми и вразумляеми, воспоим Господу, светом благодати Своея озаряющему и исцеляющему души наша: Аллилуиа.

Икос 12

Поюще славу твою, Архангеле Урииле, мы, удаленныя от тебе не токмо свойствами естества нашего, но и грехми нашими, величаем тя, близкаго ко всем, с надеждою молящимся тебе. Сице молим тя: поддержи всех иерархов и пастырей Церкви Христовой, укрепи благодатию всех подвижающихся во славу Божию, монашествующих и мирян в трезвлении и делании духовнем утверди, озари разум богословов и философов, ученых и писателей, пошли делателей на пустыющие нивы Христовы и всех нас благослови, да поем ти сице:

Радуйся, наставников и воспитателей в любви и мудрости утверждение.

Радуйся, бремени скорбящих и страждущих всерадостное облегчение.

Радуйся, благодатное вдохновение поэтом и писателем даруяй.

Радуйся, от прельщений и искушений бесовских всех любящих тя избавляяй.

Радуйся, ученым в постижении истины и уповании на всемогущество Божие возрастати сподобляяй.

Радуйся, проповедником и миссионером в их делании нелегком помогай.

Радуйся, власть имущих и начальствующих служити людям простым научающий.

Радуйся, всех ищущих правду земную к познанию Бога и путей Его приводящий.

Радуйся, богоносный Архистратиже Урииле, в долину вечной радости стопы наши направляющий.

Кондак 13

О пречудный и преславный покровителю наш и заступниче небесный, всеблагий Архангеле Урииле, предстояй купно со иными Архистратизи пред престолом Триипостаснаго Бога, помози всем с верою, надеждою и любовью призывающим всечестное имя твое во всех наших делах, духовных и земных, яко тобою направляеми да пройдем путь жития нашего достойно и беспректновенно и

сподобимся купно с тобою воспевати
Всемилосерднаго Господа нашего, посылающего
ангелы своя на служение спасению человеков:
Аллилуиа. Аллилуиа. Аллилуиа.

[Сей кондак читается трижды. Затем икос 1 и
кондак 1.]



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**